

Նոր խմբագրությամբ գրանցված է

Հայաստանի Հանրապետության
կենտրոնական բանկում

Նախագահ՝ Արթուր Չավադյան

« 29 » մարտ 2010թ.

**ՆԱՍԴԱՔ ՕԷՄԷՔՍ ԱՐՄԵՆԻԱ
ԲԱՑ ԲԱԺՆԵՏԻՐԱԿԱՆ ԸՆԿԵՐՈՒԹՅՈՒՆ**

**ՊԵՏԱԿԱՆ ՊԱՐՏԱՏՈՍՍԵՐԻ
ԱՌԵՎՏՐԻ ԿԱՆՈՆՆԵՐ**

Գլուխ 1. Հասկացություններ

- 1) Սույն կանոններում կիրառվող հասկացություններն ունեն սույն գլխով սահմանված նշանակությունները:
- 2) **«Պետական պարտատոմսերի շուկայի մասնակից».** ՀՀ Կենտրոնական բանկը, ինչպես նաև այն Բանկերը, Վարկային կազմակերպությունները և Ներդրումային ընկերությունները, որոնք Օպերատորի հետ ունեն առևտրին մասնակցության վերաբերյալ գործող պայմանագիր և որոնց Օպերատորի կանոններին համապատասխան թույլատրվել է մասնակցելու պետական պարտատոմսերով Օպերատորի կողմից կազմակերպվող առևտրին:
- 3) **«Լոտ».** գնման կամ վաճառքի հայտում նշվող՝ պետական պարտատոմսերի քանակական չափման միավոր, որը համարժեք է պետական պարտատոմսերի անվանական արժեքի 100 (մեկ հարյուր) ՀՀ դրամին:
- 4) **«Մարեր».** տվյալ թողարկման պետական պարտատոմսերի գնման (վաճառքի) լավագույն գնի նկատմամբ առևտրային համակարգ մուտքագրվող գնման (վաճառքի) հայտերի գների տարբերության առավելագույն թույլատրելի սահման:
- 5) Սույն կանոններում կիրառվող այլ հասկացություններն ունեն «Արժեթղթերի շուկայի մասին» ՀՀ օրենքով և Օպերատորի կանոններով սահմանված նշանակությունները:

Գլուխ 2. Պետական պարտատոմսերով գործարքների կնքումը

- 1) Օպերատորի առևտրային համակարգում պետական պարտատոմսերով գործարքներ կարող են կնքվել առևտրային և հետառևտրային նստաշրջանների ընթացքում՝ Օպերատորի «Առևտրի ընդհանուր կանոններով» և սույն գլխով սահմանված կարգով:
- 2) Պետական պարտատոմսերով առևտուրը Օպերատորը երկկողմանի անընդհատ աճուրդի եղանակով կազմակերպում է իր պետական պարտատոմսերի հարթակում:
- 3) Օպերատորի գործադիր մարմնի ղեկավարի որոշմամբ նախատեսված դեպքերում պետական պարտատոմսերը կարող են շրջանառվել նաև հասցեական գործարքների հարթակում և ռեպո գործարքների հարթակում:
- 4) Օպերատորը պետական պարտատոմսերով առևտուրը կազմակերպում է լրիվ նախնական դեպոնացման պայմաններում՝ սույն գլխի 5) - 7) կետերում սահմանված առանձնահատկություններով:
- 5) Պետական պարտատոմսերի շուկայի մասնակիցների կողմից Օպերատորի «Պետական պարտատոմսերի քլիրինգի և վերջնահաշվարկի կանոններին» համապատասխան կատարված լրացուցիչ դեպոնացումների դեպքում համապատասխան չափով ավելացվում են դեպոնացված պետական պարտատոմսերի և/կամ դրամային միջոցների մնացորդները:
- 6) Առևտրի մասնակիցը կարող է իր տերմինալից (հեռացված տերմինալից) ամբողջությամբ կամ մասնակի ապադեպոնացնել պետական պարտատոմսերի շուկայի տվյալ մասնակցի դեպոնացված պետական պարտատոմսերի և/կամ դրամային միջոցների՝ առևտրային համակարգում տվյալ պահին առկա և ազատ (չարգելադրված) մնացորդը կամ դրա մի մասը, որի դեպքում ապադեպոնացված միջոցների չափով նվազեցվում է դեպոնացված տվյալ թողարկման պետական պարտատոմսերի կամ դրամային միջոցների մնացորդը: Առևտրի մասնակցի կողմից ապադեպոնացված միջոցների հետ կապված հետագա գործառնություններն իրականացվում են Օպերատորի «Պետական պարտատոմսերի քլիրինգի և վերջնահաշվարկի կանոններին» համապատասխան:
- 7) Օպերատորի կանոնների համաձայն միաժամանակ պետական պարտատոմսերի և լրիվ նախնական դեպոնացման պայմաններում Օպերատորի կողմից կազմակերպվող արտարժույթի առևտրին մասնակցելու իրավունք ունեցող կազմակերպությունների դեպոնացված դրամային միջոցների մնացորդները կարող են փոփոխվել նաև արտարժույթի առևտրի ընթացքում պետական պարտատոմսերի շուկայի տվյալ մասնակցի անունից հանդես եկող առևտրի մասնակիցների կողմից մուտքագրված հայտերի և կնքված գործարքների արդյունքում՝ Օպերատորի կանոններով սահմանված կարգով:
- 8) Առևտրային նստաշրջանի ընթացքում ներկայացվող՝ պետական պարտատոմսերի գնման (վաճառքի) հայտում նշվող լոտերի քանակը պետք է բազմապատիկ լինի տասին, իսկ մասնակի մարումներով պետական պարտատոմսերի դեպքում՝ նաև տվյալ առևտրային օրվա դրությամբ տվյալ թողարկման պետական պարտատոմսի մնացած մասնակի մարումների թվին:

- 9) Առևտրային համակարգի կողմից չեն ընդունվում և առևտրային համակարգում չեն գրանցվում պետական պարտատոմսերի շուկայի տվյալ մասնակցի անունից ներկայացված հայտին պետական պարտատոմսերի շուկայի նույն մասնակցի կողմից ներկայացվող համապատասխան հանդիպակաց հայտերը:
- 10) Տվյալ առևտրային նստաշրջանի ընթացքում չբավարարված հայտերը չեղյալ են համարվում և հետառևտրային նստաշրջանում չեն ընդգրկվում համապատասխան Հերթերում:
- 11) Հետառևտրային նստաշրջանի ընթացքում ներկայացվող հայտում նշվում են դրա բավարարման հետևյալ էական պայմանները՝
 - ա) տվյալ թողարկման պետական պարտատոմսի հապավումը,
 - բ) հայտի տեսակը՝ գնման կամ վաճառքի,
 - գ) լոտերի քանակը,
 - դ) հայտի բավարարման ժամանակային պայմանը՝ պահել հերթում կամ հանել մնացորդը:
- 12) Հետառևտրային նստաշրջանի ընթացքում ներկայացվող բոլոր հայտերը մասնակի բավարարմամբ, անմիջապես ակտիվացվող և լիմիտային հայտեր են, որոնցում նշվող գինը հավասար է տվյալ թողարկման պետական պարտատոմսերով տվյալ հետառևտրային նստաշրջանին նախորդած առևտրային նստաշրջանի ընթացքում կնքված բոլոր գործարքների միջին կշռված գնին:
- 13) Հետառևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրված՝ նույն թողարկման պետական պարտատոմսերի գնման և վաճառքի հայտերն ընդգրկվում են երկու առանձին Հերթերում՝ ըստ առևտրային համակարգում դրանց գրանցման ժամանակային առաջնահերթության:
- 14) Հետառևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրվող ցանկացած հայտին Հերթում հանդիպակաց հայտի (հայտերի) առկայության դեպքում առևտրային համակարգում գրանցվում է առուվաճառքի գործարքի (գործարքների) կնքում:
- 15) Եթե հետառևտրային նստաշրջանի ընթացքում ներկայացված հայտն առևտրային համակարգ մուտքագրվելու պահին Հերթում առկա հանդիպակաց բոլոր հայտերով բավարարվելուց (գործարքների կնքումից) հետո այնուամենայնիվ բավարարվում է մասամբ, ապա մնացորդը (հայտի չբավարարված մասը) ընդգրկվում է Հերթում սույն գլխի 13) կետում նշված կարգով կամ չի ընդգրկվում Հերթում՝ կախված հայտի բավարարման ժամանակային պայմանից:
- 16) Եթե հետառևտրային նստաշրջանի ընթացքում ներկայացվող հայտին հանդիպակաց հայտեր Հերթում չկան, ապա այն ընդգրկվում է Հերթում սույն գլխի 13) կետում նշված կարգով կամ չի ընդգրկվում Հերթում՝ կախված հայտի բավարարման ժամանակային պայմանից:
- 17) Տվյալ հետառևտրային նստաշրջանի ընթացքում չբավարարված հայտերը չեղյալ են համարվում և հաջորդ առևտրային նստաշրջանում չեն ընդգրկվում համապատասխան Հերթերում:

Գլուխ 3. Սպրեդ

- 1) Երկկողմանի անընդհատ աճուրդի եղանակով պետական պարտատոմսերով կազմակերպվող առևտրի համար սպրեդը լավագույն հայտի գնի նկատմամբ սահմանվում է առևտրային նստաշրջանի ընթացքում տվյալ պահին հայտերի համապատասխան հերթում ընդգրկված վաճառքի (գնման) լավագույն գնի ± 5 տոկոսը, ընդ որում՝ առևտրային համակարգում չեն գրանցվում գնման այն հայտերը, որոնցում նշված մեկ լոտի գինը տվյալ պահին առևտրային համակարգում գրանցված գնման լավագույն գնի համեմատ պակաս է 5-ից ավելի տոկոսով, և վաճառքի այն հայտերը, որոնցում նշված մեկ լոտի գինը տվյալ պահին առևտրային համակարգում գրանցված վաճառքի լավագույն գնի համեմատ ավել է 5-ից ավելի տոկոսով:
- 2) Հասցեական գործարքների հարթակում պետական պարտատոմսերով կազմակերպվող առևտրի համար սպրեդը լավագույն հայտի գնի նկատմամբ սահմանվում է տվյալ պահին երկկողմանի անընդհատ աճուրդի եղանակով պետական պարտատոմսերի հարթակում տվյալ թողարկման պետական պարտատոմսերով ներկայացված լավագույն հայտերի գների ± 5 տոկոսը, ընդ որում՝ առևտրային համակարգում չեն գրանցվում այն հասցեական հայտերը, որոնցում նշված մեկ լոտի գինը տվյալ պահին առևտրային համակարգում գրանցված գնման (վաճառքի) լավագույն գնի համեմատ պակաս (ավել) է 5-ից ավելի տոկոսով:

Գլուխ 4. Պետական պարտատոմսերով կնքված գործարքների կատարումը

- 1) Պետական պարտատոմսերով առևտրային համակարգում կնքված գործարքների արդյունքում ծագած՝ փոխադարձ պարտավորությունների և պահանջների որոշումը, հաշվանցումը, վճարահաշվարկային փաստաթղթերի պատրաստումն ու վերջնահաշվարկի կատարումն իրականացվում է գործարքի կնքման օրը՝ Օպերատորի «Պետական պարտատոմսերի քլիրինգի և վերջնահաշվարկի կանոններով» սահմանված կարգով:
- 2) Պետական պարտատոմսերով առևտրային համակարգում գործարքներ կնքված պետական պարտատոմսերի շուկայի մասնակիցները, որոնց կազմում կամ անունից հանդես են գալիս գործարք կնքած առևտրի մասնակիցները, պարտավոր են Օպերատորին վճարել Օպերատորի «Սակագների մասին կանոններով» սահմանված համապատասխան միջնորդավճարները:

Գլուխ 5. Կանոններում փոփոխությունները և լրացումները

- 1) Սույն կանոններում փոփոխություններն ու լրացումները դրա անբաժանելի մասն են և ուժի մեջ են մտնում օրենքով սահմանված կարգով, եթե այլ բան սահմանված չէ սույն կանոններով:
- 2) Սույն կանոնները նոր խմբագրությամբ ուժի մեջ են մտնում ՀՀ կենտրոնական բանկում գրանցվելուց հետո՝ Օպերատորի գործադիր մարմնի ղեկավարի որոշմամբ սահմանված օրը՝ սույն կանոնների նոր խմբագրությամբ նախատեսված փոփոխությունների կիրարկումն ապահովող բոլոր փաստաթղթերի և պայմանագրերի ստորագրումից հետո:

Հաստատված է
«ՆԱՍԴԱՔ ՕԷՄԷՔՍ ԱՐՄԵՆԻԱ» ԲԲԸ
ղիտորդ խորհրդի որոշմամբ

_____ **Արմեն Մելիքյան**

«16» նոյեմբերի 2009թ.
ք. Երևան
ՀՖԲ-01/117Լ